

Nunatsinni avatangiisinut aningaasaateqarfimmik pilersitsinissaq sulissutigeqqullugu kiisalu Inatsisartut aningaasanut inatsisaanni konto 24.11.23-mi naatsorsuutit, nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmut atugassanngorlugit immikkoortinneqartalernissaat sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. (Siumut sinnerlugu Inatsisartuni ilaasortaq Kim Kielsen)

Akissuteqaat

(Ineqarnermut, Pinngortitamut Avatangiisinullu Naalakkersuisoq)

Siullermeerneqarnera

Naalakkersuisut sinnerlugit Siumut sinnerlugu Inatsisartuni ilaasortaq Kim Kielsen siunnersuuteqarneranut qutsavigaara. Avatangiisinut suliassaqarfimmi annertunerusumik suliniuteqarnissaq pisariaqartinneqartoq, taamaattumillu suliassaqarfimmut aningaasanik salliutitsinissaq pisariaqartinneqartoq pillugu Naalakkersuisut isumaqataapput.

Kim Kielsen-ip aalajangersimasumik uuliaarluertoqarnissaanut upalungaarsimaneq, eqqagassalerineq imermillu errortuivikumik saliisarneq annertunerusumik suliniuteqarfigineqarnissamik pisariaqartitsiviusutut taavai. Tamatumunnga Naalakkersuisut isumaqataasinnaapput.

Eqqagassalerinermi ajornartorsiutit annertuut aaqqiiffigisariaqarpagut. Pingaartumik illoqarfinni minnerusuni nunaqarfinnilu eqqagassanik ulorianaatilinnik passussisarneq naleqqutinngitsoq, eqqaavissuarnit akuutissanik avatangiisinut seerisoqartarnera, aammalu eqqakkanik ammaannartumik ikuallaanermi silaannarmik mingutsitsisarneq annertuumik unamminartuutinneqarpoq. Tamakku avatangiisinut peqqissutsimullu ajoqusiisarmata.

Unammilligassat annertuut taakku aaqqiiffigissagutsigit, aammalu eqqagassalerinermik naleqquttumik qulakkeerissagutta isumalluutit amerlineqarnissaat pisariaqarpoq.

Kommunit eqqagassanik passussisarnermi eqqaasarnermilu pingaarnertut oqartussaasutut akisussaasuupput. Kommunit ilaasa assigiinngitsunik peqquteqarlutik suliassaq taanna naammassisinnaasimanngilaat salliutissinnaasimanaguluunniit. Taamaattumik kommunit oqaloqatigalugit aningaasaliissutissat naleqquttut qanoq ililluta nassaarisinnaanerlugit misissuisariaqarpugut.

Nunatsinni avatangiisinut aningaasaateqarfimmik pilersitsinissaq sulissutigeqqullugu kiisalu Inatsisartut aningaasanut inatsisaanni konto 24.11.23-mi naatsorsuutit, nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmut atugassanngorlugit immikkoortinneqartalernissaat sulissutigeqqullugu Naalakkersuisut peqquneqarnissaannut Naalakkersuisut isumaqataapput.

Taamaattumik avatangiisinut aningaasaateqarfimmik pilersitsinissamut siunnersuummi suliassaq Naalakkersuisut ingerlateqqinniirpaat. Suliame tassani aqqissuussaanermik isumatusaartumik, avatangiisinut politikkiimi suliassaqarfiullu iluani tulleriiarinermi

naalackersuinikkut nakkutilliinermik tamakkiisumik qulakkeeriffiusumik pilersitsinissaq pingaartinneqassaaq. Tamanna pissutigalugu ilaatigut Sanaartugassanut Iluarsagassanullu Aningaasaateqarfiup aaqqissuussaanera ingerlalluartoq, tamatumunnga naammassinniffiusinnaanermi saniatigut aamma aningaasartuutiviusunik tunngaveqartoq misissussavarput. Suliassaq missingersuusiortarnermut inatsisip iluarsaanneqarnissaanut, 2014-imi Inatsisartuni suliarineqartussatut naatsorsuutigineqartumut ataqatigiissaarneqassaaq.

Matuma siuliani taaneqartut tunngavigalugit aalajangiiffigisassatut siunnersuut akuerineqassasoq Naalackersuisunit inassutigineqarpoq.